

小謨觴館詩文集

小謨觴館詩集卷第五

鎮洋

備書集

乙卯迄丙辰

昔樊南祭姊文云衣裳外除旨甘是急乃占數東備備  
書販春予自丁閔凶衣食驅遣始客京口繼客楚州誠  
有如樊南所云既祔故邱便同逋駭者賓館淒清波路  
壯濶苦蟲寒鶴時復一呻爰取備書以名是集凡乙卯  
丙辰以後詩悉系於此云嘉慶戊午涂月下澣甘亭居  
士書於小謨觴館

雨泊無錫小病

乙卯

荻花楓葉太淒清  
水宿風鐙第二程  
鄉思劇於新病夜  
雨聲踈到欲闌更  
三生埜寺眠雲夢  
一笛鄰船折柳情  
不忘旗亭

前度酒吳鹽如雪破香橙

客京口寓居興善寺山樓雜詠九首

雲籀一角抱山成  
山月當窗夜氣清  
壑底松簷寒不奏  
細風攪下讀書聲

層層石磴聳精廬  
天許狂奴半榻於  
我比仙人計兼得  
好樓居更好山居

篆冷旃檀案似冰  
偶同開士話三乘  
一般瘦影秋鐙裏  
失路詞人退院僧

香積休嫌口腹虛  
僧如佛印解燒豬  
東坡正要蒸豚餉  
肯把清齋苦律渠

夜寒爐火熱僧寮  
院主殷勤燭共挑  
除卻丹霞俱木佛  
不妨權取兩尊燒

獨獠偏能悟淨因一編指月讀千巡須知妙解菩提者不是  
巍峩上座人

酒酣時復唱烏烏伏檻吟成壯志孤值得山僧供一笑長明  
鐙下讀陰符

啖芋空誇宰相才十年心似嬾殘灰只應常傍羣牛臥那有  
工夫拭涕來

堆案楞伽未是遲火傳懸解寸心知困來合眼飢來飯定律  
新參海慧師

夜讀西方書戲占

一縛佉盧信手拈夙根枉用證華嚴人生妻肉誰拋得我比  
周何累尚兼

焦山三首

中流一柱氣網緼浮玉東來日乍曛花雨三千龍象座暮潮  
十萬鸛鵝軍天撐靈島分江海僧共陽侯占水雲取醉莫辭  
京口酒下山清嘯半空聞

朱方迴首鬱陂陀白浪青燐戰壘多聞越南天雄鎖鑰孫盧  
故鬼化鼃鼃時清烽火停長戍客暇登臨足浩歌北府兵聞  
從古勁丁寧東海慎揚波

杖策眞爲莽蒼遊海天魂夢費勾留直須彌勒同龕住絕勝  
鷗夷一舸浮大地鵬程快搏擊百年雞鵲笑拘囚從今眼倦  
鶯花路曾向雲濤洗兩眸

焦隱士祠

隱士爲焦光詩作焦先從舊說也

帝王夜走平津路六百炎精積漢祚斗牛王氣占許昌讖屬  
當塗亦天數一時英儁爭著鞭臥龍雛鳳歸西川鹿門獨偕

水鏡隱繼者鼻帽遼東賢先生早具鴻冥志青犢黃巾賊紛  
至結茅靜對海門潮干戈不省關中事五官受禪漢室空天  
子去作山陽公漢家不事肯事魏半畝老守瓜牛宮四海紛  
紛歸典午天爲先生畱片土一聲祝衄浩歌起面面魚龍聽  
而舞結樹申屠隱梁碣牆東牛僧逃新莽後先肥遯軌轍同  
海色江光見靈爽石窟巉崑古洞虛黃初往事重欷歔失身  
尚惜荀文若賣國安論華子魚

瘞鶴銘

夙聞焦山足瘞鶴畱古銘顛厓蝕巨浪字失秋虵形永叔癖  
金石鉤摹得零星華陽與逸少論辨紛畦町江海蕩不去要  
是物有靈何年出幽壑移置山間亭沙痕裂石罅字脚餘龍  
腥齧缺頰周鼓叢殘方壁經風波一出險壽足垂千齡海雲

欽  
暝色蘿薜搖空青  
陰磔撼蛟蜃蒼苔聞古馨  
何當臥碑下  
仙梵雲中聽

焦山諸庵紀遊八首

香林誰位置菴以自然名  
峭壁承花座秋潮雜梵聲  
國鄰龍伯近山對象王  
明天與安調御何須問化城

自然庵

一氣渺鴻濛祇園雲海中  
蜃樓秋霧白魚眼怒濤紅  
佛日暉窮髮鯨人拜大雄  
天風送清磬直下尾閭東

海雲庵

師座憑虛構龍鱗拔地高  
霜皮和雪浪日夜吼風濤  
有客依棲鶴何心學釣鰲  
好畱寒綠在容我讀離騷

松寥閣

別一峰頭寺攀林蹋閣游  
秀森螺髻翠高壓卯天秋  
瓶拂南

能座鐘魚歌利樓頻伽何處鳥  
空際聽鉤輅

別峯庵

人影入叢綠清秋生薄寒  
碧雲浮黛色冷日漏經壇  
氣逼千

岳爽風梳一徑寬小窻如可飭茶竈爲予安

竹樓

絕壁銜孤剝危樓占上層石爲奇鬼立人學捷猱登怖鴿依

禪榻飢鼯瞰佛鐙欲從龍躡去繫日借長繩

石壁庵

地掃紅塵跡天開祇樹林四圍溟渤氣一片妙明心不隔孤

雲相長邀慧月臨琉璃原法界安用布黃金

水晶庵

度佛不成佛西方父母推善權千種仰法座一峯危五濁浮

生幻三災世路悲舉頭靈鷲近磨衲許追隨

文殊庵

### 雨夜對酒作

元冬客江城孤館鄰市井暮吹淒風簾暝雲欲諸嶺避喧無  
良策一雨聊自幸瀟瀟定何物能使羣動靜虛室延微涼瓶  
花抱孤影紙窗疎自鳴短燭寒猶耿塵寰競紛華公府事朝  
請奔走埃壒間冠裳慎要領安知江湖客樂此清淨境湛然



坐蕭閒丈室有箕頰熾炭溫酒鎗呼僮薦溪荷幢幢簷溜急  
隱隱蕉鐘警守寂生遙思道心發深省明當看北固溼翠侵  
衣冷

秦郵道中五首

碧玉邗溝箭樣流紅樓昨夜夢揚州畫簾十里橫波目不敵  
珠湖一片秋

射陽陂畔漲參差甍社湖頭烟暝時一帶汀蕪一弓月霜花  
濃到露筋祠

天津橋上杜鵑愁元祐詞人黨籍收畢竟才名累公等文游  
臺枉說千秋

少日詞壇筆陣開髯秦淮海艷高才蘇翁仙去涪翁逝誰識  
無雙國士來

揭竿人嘯海陵倉小竊江東古戰場此地符離城不遠靈旗  
應傍縣頤王

高郵

覆孟城外接滄溟面面湖光霧氣腥元蟬吐珠明夜黑白鼉  
吹浪失天青隄巖竹櫓千夫鋪風飽椰帆一葉萍曾讀河渠  
談水利幾人憂患究業經

汜光湖

明武宗征宸濠駐蹕於此

湖波三十六迢遙入寶江城見麗譙黃竹若爲歌雨雪翠華  
當日下雲霄弄兵帝子潢池靖並海君王鳳舸饒青史觀魚  
遺蹟在要尋鷗侶話前朝

客京口日蔣友之

世

將遊皖江順道過訪去後以詩

見寄次韻酬之

長鏡白木願仍乖獨客淒然謝勝儕大地江山供雪爪異鄉  
花月掃風懷庚寅楚頌千番讀丁卯詩人一壑埋不道南徐  
小樓泊帽簷有爾款蕭齋

再疊前韻

龍堆馬邑舊遊乖

友之尊人香涇先生宰山右之馬邑與先君子爲丙戌會試同年

憔悴飛

狐問絹儕廉吏兒孫成並命羈孤兄弟似同懷兩家葛帔淒  
風緊一樣瀧岡宿草埋偶釣鱸魚四十九江湖愁思滿空齋

三疊前韻

韻帖詩筒興未乖青衫人憶蔣防儕賦成鸚鵡秋盈篋泣化  
瓊瑰夜滿懷脉望未仙頭屢責糟邱可築首應埋行當拋去  
揚雲席另結天龍選佛齋

四疊前韻

風饕雪壓計真乖  
砭北生涯笑我儕  
一卷長楊羞自獻  
三年漫刺且須懷  
家聯白板還稱舊  
名在青山未可埋  
殘臘片帆江上待  
足音重訪淨名齋

淮陰雪夜

虛幌紅爐夜色闌  
淮壖如掌雪花攢  
半生吳楚遊原壯  
一飯英雄古亦難  
松偃蒼龍愁老榦  
客爲堯鶴怨新寒  
由他馬耳雙尖沒  
官燭燒殘嬾去看

里中除夕

一爐寒火炷烏銀  
此夕團圞夢乍真  
搔鬢預愁將盡夜  
得歸何恨暫時人  
屠麻酒向山妻索  
菜甲盤從竈婢陳  
絕勝常州蘇玉局  
孤篷遙夜話酸辛

元旦試筆

丙辰

又轉蒼龍角重繙太史書紅雲闔闔路白雪野人居鬢短星  
霜裏才消患難餘百年曾易滿春信渺愁予

曙旭

曙旭升初旦朝霞啟麗春光原煥鳩鵲天暫闕麒麟去歲元旦食  
已下三條赦頻蠲兩府繙何煩鮑司隸封事建章陳

不換

不換桃符舊長關竹戶斜戲仍簪栢葉詩總欠梅花風俗安  
鄉井輪躑誤歲華暫時椒酒盞終勝市廛賒

庭梅盛開花下作

息影衡門百計非萍蹤端只爲花歸絕奇蓬戶留仙袂恰有  
春人對縞衣瑞腦香和金獸暖曉簾風穩翠禽飛前塵魂斷  
江關道古驛黃茅卓酒旗

新正雪霰達夜

淅淅復泠泠，寒威逼火青。  
重看今夜雪，難得故園聽。  
折竹墮幽響，薰篝淒薄馨。  
刀環宵夢穩，勝絕子雲亭。

立春日口占

時將出門

北道征人已買槎，雁羣北返亦牙牙。  
一般拋卻江南去，只只春鴻是到家。

將之淮上留別家人四首

衝雪歸來席未溫，虛堂人又愴離樽。  
北轅南柁重憂患，東里西華弱弟昆。  
大好風花供點筆，早孤兒女怕當門。  
長貧不及王章婦，猶共牛衣拭淚痕。

饑遊仍逐海陵槎，人去紅閨噪晚鴉。  
風似有情還阻客，壻真無賴慣拋家。  
瞻烏屋豈謀全左，挽鹿車原望太奢。  
祇是別來

膏沐嬾點妝孤負玉梅花

此去花間翠袖單乳鶯雛燕感無端好拈繡帖閒翻譜莫望  
天涯數倚闌錦帶書堪消夜永剪刀風要慎春寒狂夫略比  
連波勝肯使璫機仿若蘭

片帆南浦趁芳辰不用臨歧絮語頻有地儘教栽苦竹無田  
寧敢怨勞薪生涯易了惟應儉家事差閒好在貧先把日歸  
期說與待梅如雪雪如塵

婁東賃舟甚小示同舟友人

野航人可兩三留五尺艤櫓也遠游此地船都輕似葉我儕  
屋尙小於舟依然春水疑天上不礙風帆指石頭一片紅旌  
數聲鼓狂奴心早薄通侯

岸次作

橐筆依然索米身  
雨天黳黑問前津  
僮肩襪被番番慣  
路踏江湖步步陳  
差喜朋簪聯白舫  
幸毋風色怒青蘋  
到淮準被山英笑  
今古看他乞食人

夜發太倉次馬鞍山下

翩翩西去帆似馬  
不可鞚娟娟下弦月  
南浦獨相送舵牙水  
微明草露冰猶淞  
寒兀孤峯青蛾眉  
向人貢蒼支一拳瘦  
翠闕千巒凍老鶻翻  
厓陰白雲補巖空  
玉山事已非金粟人  
如夢當年草堂客  
歌嘯寂鸞鳳饒樂無  
千齡風塵真可慟  
琳宮掩深更落月在  
梁棟石齒微瀾生  
春潮暗中弄長歌問  
老鐵一醉能無痛

虎邱山

觀山如觀人  
貌古不厭癡  
舍真論華藻  
謬論笑拾瀋  
孱顏海



湧峯蒼翠撲衣衽石怪猿猱攀潭空魚鮪淦星芒闕雄劒殺  
氣兀猶凜謖謖蒼龍鱗清風良可飲吳兒不解事人力肆雕  
鏤雜揉亂丹腹緣飾紛綈錦坐令雄秀姿金粉失天稟晚風  
動游袂絕頂聊蹕蹕新月生溪杉幽輝浸沙礫長年一柳栗  
經過凡幾稔擷芳自臨壑烹薺還獨品三嘆返樸言此理誰  
當審

阻風二首

日日蒲帆飽似弓稱心癡擬駕樵風憂生漸識盈虛理政要  
江神暫惱公

多憂身世傲平生客路由他百怪驚十丈鯨波喧不管浪花  
堆裏一詩成

舟次京口水淺不得行

夜行慶亭路千帆如馬馳朝泊徒兒浦沙淺愁篙師長川不  
容刀萬舸相撐支瓣香祝水長共禱江上祠仕宦需利涉商  
賈競刀錐同抱欲速心各各求其私而我倚舫笑無官亦無  
資揚帆固所願滯淫豈足辭均之在羈旅去住理無差銜杯  
綠盈醪斫鱸紅成絲青青黃鶴山對我生奇姿此卽神貺我  
千請復何爲獨嗟踏浪兒袖手閒自嬉有技不得展有力無  
從施何異賢豪人抱才當數奇臨流自擊楫歌落江天悲

西津曲

癡龍無靈長官怒淤沙塞斷西津渡駸駸萬斛膠不行咫尺  
天涯望瓜步向來輓粟由長江直瀆浩渺愁驚瀧自從練湖  
開濟運帶水一日行千艘清漪蓄水隄置牖拭沙出江規可  
法大挑小挑工及時畚鍤元冬垂令甲太倉紅粟儲非易一

粒須勞千指臂吳杭已令督農桑楚相仍須求水利從來治  
河如治疾濬淪疏通無二術苟能抉剔窮根株何至萌芽成  
壅窒今年異事亦獨何春潮斗落淤泥多官錢已糜役已畢  
要仗三尺桃花波長吏紛馳庶人走共向神祠拜稽首人力  
未至求天全此語傳聞古來有老鴉銜肉香紫紆我爲一笑  
付子虛鄭公不作孫叔死掩蓬自讀河渠書

覆舟行

中冷片石撐盤陀珠跳雪噴成盤渦輕舸我昨翦江渡之字  
帆影如投梭屢經險地了無險恍歷砥道車鈴和誰知邗溝  
衣帶水乃有駭浪高峩峩橫風摧檣舵無力敲側掀簸如旋  
螺船窗四面水飛立溼我冠素裘黃紕舟人絕叫同伴怖我  
持詩卷仍咿哦敝書數冊無長物攫取何用煩蛟鼉平生忠

信不敢保頗恃窮薄輕風波須臾風定水亦息陽侯歛袂舟  
無頗險中出入兩如夢前行且博朱顏酡忽驚人聲亂鴨驚  
誰歟來船怨孟婆喧言舟傾死七口中有宰官髮未皤州符  
事急風水惡浩劫同日遭羣魔人生何地不憂患畏路豈必  
江與河我初在險心坦若見此清淚翻滂沱官非楚屈平曷  
爲沈身如汨羅官非李供奉騎鯨母乃能詩歌茫茫天意不  
可識我生彼死一刹那過海莫羨封尉佗油幢莫羨楊沙哥  
請看死者垂青綯便當歸種二頃禾至老不復經江沱胡爲  
篙工復理楫水程促速憂蹉跎前車在眼不知戒鳴榔坐嘆  
勞人多嗚呼奈此勞人何不見覆舟旁又千艘過

邵伯埭夜泊

烏榜叢蘆岸蝦蟆野戍更波澄裂魴鯉沙白語鷓鴣照鷓鴣檣

言身卷三  
一  
鐙落懸蛛柳月明夜深誰說鬼燐火草間生

舟中夜起

蒼蒼煙外水碧淨暗無痕缺月挂天末凍雲圍一村潮生寒  
蚓弔舫觸大魚奔縱有叩須客詩情孰可論

二月十日尤二娛學博

維熊

過飲淮陰郡齋歸後以

詩見貽奉報三首

梅柳隨春盡渡江酒兵新拉鬪鷄缸鄉音吳語人三兩遲旭  
風簾蜨一雙來日大難眉要展此君小異氣先降何當共擬  
登樓賦賭取龍文筆力扛

江東傾倒郊嘉賓舊是芙蓉幕府人五兩綸摧才子氣一條  
冰傲冷官身何妨下走呼牛馬且要高歌泣鬼神轉眼社公  
時節好更須同墊雨中巾

觸撥前塵意惘然  
玻瓈十頃潁湖煙  
邀頭白苧新翻曲  
飮座黃裳最少年  
猛士詩人星落落  
藥闌花嶼夢綿綿  
無端一夕高齋會  
又動離愁到楚天

卽事

擔風握月總無情  
一卷元經也嬾橫  
蘸水柳能增影媚  
釀寒天不放雲行  
厭名世味思原熟  
久客鄉程夢亦生  
差喜道人春睡穩  
曉窗紅樹澁鶯鶯

春半作

二月春愁雨釀成  
韓侯祠畔客心驚  
流民多倍三千士  
粒米珍同十五城  
取醉薄休嫌魯酒  
寫哀聲不厭秦箏  
如何芳草天涯路  
偏向高樓望處明

雨中小飲

簾閣薰爐裊篆烟  
筆牀茶臼鎮蕭然  
忍寒花學曉妝女  
積雨春如病少年  
家遠并無書道憶  
詩慵賸與酒爲緣  
何因更續嬉遊夢  
桑葉城南拾翠鈿

書悶

青鋒繡澁舊吳鉤  
少學雕蟲壯自羞  
豈有聲華爭八采  
枉窮騷雅讀三侯  
書生末路依人鳥  
倦客天涯喘月牛  
多愧射鵰飛將侶  
短衣狂作北平游

官屋

官屋蕭閒寄病身  
石泉槐火逐時新  
車中婦笑成三日  
陌上花虛度一春  
夙好尚耽詞側豔  
清愁難被酒溫醇  
青山回首昌亭路  
可有支公許結鄰

小窗

我嗟錄錄無奇節人道鏗鏗善說經退鷁羽毛還自愛不龜  
醫藥恐無靈書探馬鄭匡安國詩綜韓毛補考亭懽悴巾箱  
成底事小牕鐙火鎮青熒

客中聞婦弟蔣大

訓陽

訃以詩遙哭之得六首

尺素驚傳淚似潮修文徵到阿龍超曇花一現天何苦玉樹  
千春恨豈消幸早徵熊留息弱可堪彈鵠有年韶客中斗頓  
存亡感未到中年鬢已凋

我昔初披樂廣天膝前文度恰隨肩

戊申歲調外舅時傷  
先生婦弟初成童

傷

心栢寢騎箕

日纔過荷衣拜客年千緡生涯無世業兩言清

白是家傳

外舅歿歷卿貳清操自勵備  
道山後家貧甚幾不能舉火

蘭摧玉折何容易不

續元文便九泉

道山人去戟門清雛鳳桐花已有聲能讀父書排甲乙頗聞



人許作公卿身羸大抵緣憂患年少翻嫌太老成尚有春暉  
堂北在望雲難問夜臺情

謝家竭末半凋殘

外舅諸郎皆早歿及時  
惟婦弟及弟亭陽二人

弓冶分明仗二難

縱使才消純綉福也須貧守葛衣寒如何一个天還弱直恐

重泉淚亦彈愁絕女兒年半百鏡臺迴溯更辛酸

婦弟爲子  
姊女婿姊

少寡無子僅一  
女茲又寡矣

猶記年時作客回病顏爲我勉會開事關門祚全家痛話到  
親情一倍哀豈是高明真有鬼可知子弟不宜才零星賸有  
遺文否擬向書堂細問來

客裏哀歌倍損神清明况值落花辰無多戚里今餘幾如此  
風光又哭人屬纊未看成隔世束芻還欠奈躋身鵠原料有  
山妻痛并得嘯痕過一春

三月二十日飲

兩三竿竹少塵意百五日春多去心極欲停樽更無計撲人  
香絮太惜惜

梁燕詞二首

翠幔延孤翦紅襟語曉寒三春不風雨安識構巢難  
主人堂上意謝女閣中詩莫倚穿簾慣旁喚有侍兒

春歸引

折花插瓶案頭置一室看春春自媚案頭一片落花飛黯  
然已有春歸意春歸復春歸雲車驟八驂青帝遙遙只上征  
無限世間兒女情丈夫髮不久元女子容無十年春歸亦任渠  
歸耳卻使羈愁滿楚天

尤二娛學博招飲尊經閣下

春風吹愁不肯停旅人曉夢兀易醒崢嶸五嶽起方寸長鎗  
短勺煩礪礪穠葩壓檐報鵲鳩游絲攪樹飛蜻蜒酒徒一散  
風裏籜塊影三月籠中餽分無好會繼顏謝空憶看花評尹  
邢有時獨作鸚鵡舞廣樂自奏無人聽亦知騶卒可相對終  
恐負此湘東驕閒官多情肯憐客拉伴雖雜能忘形重樓蔽  
槐陰卓午履舄颯沓交寒廳新詩出觀雪嚼齒古帙手摩香  
繞亭天涯久乏文字飲煩君闢出新哇叮古來佳人喻佳士  
蛾眉那得皆娉婷爲雲爲龍况無定得一何用悲奇零暄暄  
晴颺細細竹杲杲白日方方庭繚煙浮幕深樹綠香雪撲盞  
雙眉青衆賓分曹亂驚鴨古歡獨領餘芳馨堂萱釋憂草蠲  
愁半日足抵三千齡德將無醉古所戒學官正勒賓筵銘衡  
愁作達亦情耳先聖未必噀雷霆益山蒼然日將夕蠟炬見

跋天沈冥酒旗光落參旗動依舊孤懸看客星

短歌

男兒三十不得侯便當賣刀去買牛六州鐵鑄大錯事衣食  
驅遣成拘囚覆羹愁振手觸諱防轉喉憂讒畏譏事塞默身  
不知愧旁人羞不聞黃牛醫許馬磨夜得眠朝安作儒生食  
貧何弗爲豪氣終難使摧挫受人予者常畏人先生自入平  
原門

夜飲露臺上月出示友

生身不墮禁酒國斫地欲歌歌不得生身不作灌將軍一醉  
已被交章劾諒哉人生行樂耳齷齪安能事修飭而公自是  
高陽徒劒膽柔心人豈識二更蒼龍奕奕蟠東南月大推半  
丸臺高樹密暮煙紫碧天露洗紅闌干呼曹挈榼手擘脯我

爲楚歌若楚舞杜陵老子容登牀盍向諸公覓嚴武

初夏招二娛過飲郡齋走筆代柬

官厨煙散一林鴉銀鹿書邀博士家舊熟酒人新熟釀已闌  
春序未闌花縱無觥令圍紅袖底勝經生擁絳紗僑客放顛  
君莫怪畧軒眉事要些些

暑夜坐露臺上

氷井排雲上星榆傍斗張電光天一角城影水中央蠶簇違  
農月槩心寄履霜願乘瓜蔓水爲訪芰荷裳

喬女詩

乾隆甲寅春有客買姬淮上逡巡喬家鬻女女爲親親貧無  
食不得復顧身一解女年十七八許身王貴河營卒夫名兩  
字銘在骨娶無資嫁無力一年兩年男東女西遠隔二解喬

家女王家人鄰勸鬻女女爲親親貧無食不得復顧身三解  
不得顧身寧不顧夫夫名兩字銘在骨無模糊黃黃者金燦  
燦者珠親得食夫則那此心區區懷中七首報夫以脰殊四解  
脰亦未殊珠亦未量買姬淮人沈子爲友形相奸媒索直  
亟疑且莫償問女女姓王夫名兩字銘在骨不敢忘五解飲  
血在胷涕不沾巾沈子疑問得其真喬家鬻女女爲親乃是  
喬家女王家人何以全之淮上逡巡六解女亦勿慮身親亦  
勿慮食婚錢拉同人告長官召王貴賜以金帛娶有資嫁有  
力男東女西永不隔甲寅春淮上客七解

同作

長洲尤維熊二娛

清河喬女不知書年紀十六頗有餘無兄與弟依父居許  
字王貴同縣住名在河營部中注聘女十年不能娶女父

老織蒲蒲賤米貴饑欲枯鄰娃笑出雙明珠勸翁鬻女毋  
躊躇女嚙向戶不能出便有官人來入室流光背面不一  
視舉袖淋漓淚痕溼明珠燭燭夜有光翁不鬻女翁命亡  
口銜石闕語不詳女非他人女姓王凜然從一義難晦衆  
釀婚錢召王貴延津劍合浦還珠女心明明女身在當其  
媒孽勢不止已向懷中藏利七有死無二二卽死問女女  
知姓王耳黃河水清清且淪女不知書女義伸嗚呼東家  
女兒工效顰胡不效彼喬家鄰

天門引

天門宕冥啟玉臺赤書琳札求仙才專精勵志升九闕蒼蚪  
踏雲六玉獰半空撼動珊瑚聲黃櫨首勒飛仙名天皇太乙  
堅且清金光試作昇元經仙人未習青函籙三張僞法招神

辱牧土宮王不用情天厨謫守三年足莊周悔作闍編郎緣  
筋白誌眯眼睚正坐誤舉靈官章噫嘻天門險莫望不如粉  
蛾貼死屏風上

蔣友之訪予淮南酒間賦長歌贈之

饑烏飛飛羽脩脩淮南看春春不韶當關闐然報嘉客短篷  
三尺停吳船我鄉蔣子好才地筆擅鯨海兼蘭茗作歌有聲  
颺鸞鳳覓粒無樹安鷦鷯風塵插脚二十載依舊雙鬢隨蓬  
飄羈雌江北我苦獨十笏齋屋如團焦不堪已習中散嬾失  
志大類相如消翩然帽影忽過我一笑四拓文窗寮是時芳  
草青未歇鳴鳩暖睡繁葉條棲棲游子獨何事壘塊各仗紅  
醅澆我醉爲君歌且謠當年結交始垂髫吾翁若翁政卓越  
晉隴代隴關峇堯荷衣躍馬塞草輒綠鬢縱酒邊花嬌不將



裙屐傲儕輩頗恃文賦輕譁囂豈知摧殞有今日空桑飲恨  
朱顏凋橘官無資生計薄披褐奏曲其聲嘶各抱遺經走乞  
食如蟲處禪愁跼跳入泥出脂事顛倒誰歟得雉誰得梟洛  
陽少年書滿腹沅湘淪謫悲聊蕭阿耄光顏字不識指揮豪  
俊羅蟬貂青天盪盪那可問差喜舊侶同清宵愁人一對酒  
一石官燭正傍朱櫻燒鑿鑿畫鼓起麗譙阮公癡哭徒曉曉  
莫愁憐才無孝標且將明月深杯邀買山有日倘招隱此間  
桂樹山之椒

題上沙汪

涵金

畫徐侯齋先生澗上草堂圖

支山橫山兩岩巒白雲在山不可招畫師畫隱畫真隱草堂  
十笏當山腰澗上先生此支戶獨行流傳表忠補席藁魂依  
香草庵采薇身老珍珠塢世間大節乃有此父盡臣倫子盡

子百年老屋尙三楹風雨深春長蘭芷川迴壑複深復深當

時自畫多苦心

侯齋先生有自繡草堂圖

誰識襟情鄭思肖但訝筆勢倪

雲林今君家近靈巖麓鄉先生行聞應熟直繪牆東一片心

汀花岸柳俱幽獨秋菊寒泉許薦無莫釐林屋墨模糊請題

五百巖陵詠

西照頭陀作

留伴清風使節圖

徐文靖公有清風使節圖

八月杪泊舟吳門偕張子白蔣友之遊郡西諸山臨

發蔣立厓郡司馬

業晉

招集繡谷交翠堂觴詠達夜

卽事賦贈三首

落日香溪櫂一停尋秋先許醉雲亭芝坊地占花扶屐柳隄

天張客聚星猛燭筒波催卷白輦屏山色預排青名園便作

梯雲看忘卻松梢鶴夢醒

竹垞初白兩詩豪酒壘吟壇此地高鶴蓋團花春擘紙犀簾

飛蓋夜分曹百年旗鼓翁仍健一輩襟裾我敢叨多謝釘盤  
闌入座牛心也與試霜刀

論文曾熟謝家香山抹微雲壻最狂半子舊慙呼小友一門

今復拜中郎

位臣爲時庸外舅從弟

朋憐禽尙情都洽客忝羊求分豈

當明發顛厓倘濡墨得詩先與質蘭堂

放舟西山夜過橫塘作

廿年夢西山夢好醒輒左秋風警踈慵野意先到我打包一  
肩欠約侶兩三可探幽如學道有願卽須果霾霽天微陰竅  
搖水鳴舵鮎埼夜光幽蟹斷長橋鎖萬萬株松篁何處逗星  
火林冥宿鳥酣露重秋衣安缺月影自佳作意不輕墮湖波  
晃鬢眉上下綠雲裏香螺指猶遙清景此亦頗明望靈巖容  
應先一笑瑤

瀆川過汪氏奚望草堂約遊靈巖

溼雲淅淅雨絲絲訪爾橫塘觥一枝人住桃花潭水上風來  
秋葉打門時無猜白鷺迎生客有福青山得畫師相約入林  
添俊侶好收粉本做迂癡

由瀆川放舟登靈巖遇雨

柁樓罷晨餐瘦日弄明晦槳牙劃波心山脊露村背延緣船  
尾掉決背撲嵐靄窈窕數玉尖雲中笑相對美人化飛煙姚  
冶有餘態青山尙風情掃此天半黛身輕短筇扶石齒蘿衣  
礙哀壑松濤翻有響無定在颼颼作復止老鸛時一款絕顛  
參雁堂石窟弔烏喙鐘魚醒雄魂法鼓振聾昧摘乳茶鐺支  
折帶岩花佩茫茫具區波盪胸消積塊平生黃塵面到此纔  
得醺黑雲忽遮頭雨勢恐朋輩依稀走徬徨山好不客愛梧

葉吟聊蕭漁歌了興廢惟當學鴟夷赤馬五湖載

靈巖雜詠五首

金瓶浥露灑玉虎尙垂綬一朶偎闌花千秋越娥影香泉法

王獻妙湛瞿曇領莫似黃奴宮嘒嘒紅鬼警

吳王井

料料復齒齒山骨孰鐫刻默默何湛湛一泓昔耶蝕割雲欠

刀霜灑瀋愛流黑絕憶黃池年君王面上墨

視池

娃宮一日聲都巷三年習鳥跡何喧喧空廊踢枝立筍輦漁

婦過桑屐茶娛入想見草承趺紅心露珠泣

響屧廊

沙棠舟泛泛箭溪水粼粼種香香山下采香兼采蘋溪花解

留麝溪月解效顰不知左關襦乃有除糞人

采香徑

西施入市日一錢便一顧夫差太將牢金椎築宮護赤雞維

甲來干將不敢怒如何艷容光尙有郭凝素

西施洞

自靈巖肩輿至穹窿山歷游諸道觀登絕頂望太湖  
夜宿閬風閣放歌

梯飈羨飛仙跳蕩作奇想昨夜丹霄下赤松朝來授我青瑯  
杖雲中撥雲雲更開山外有山迎面來蛇藤鳳笏旃蓀一徑  
不可測扶桑漏影照耀金銀臺筍將軒軒兩髯足頗似陵霞  
駕雙鹿脚底樵風忽倒扶吹上諸天三十六天門啟呀然黃  
冠長揖當我前謂隱非隱仙非仙但覺鬢眉清蒼衣袂古中  
有玉宸殿上香爐烟爐烟四翻清都紫微璿題瑤祀金支翠  
旗瓊窗霧閣紅雲幽邃皎日不敢瞰非耶是耶白晝奔走干  
靈祇靈之依在山岳三茅峯更奇絕伏龍嗜虎踞殿獐以手  
觸之鏗有聲星幢羽帔靜不怒毋乃前身我亦季孟山元卿  
俄然高穹隘而妨身在諸天又天上沐日浴月太湖萬頃爛

銀堆收入雙眸了無漲洪濤拍山山影搖金堂玉女笑向招  
我欲奮身一擲輕鴻毛尻輪未能駕昏鐘下方作厭頂星芒  
手摘歸翩翩身逐松花落食我誰河上翁館我誰赤鯉公莞  
黃蒲碧松火紅踞雲安牀雲氣通時復縷縷時蓬蓬鈞天何  
處奏半空笙簧簫籟遙遙隱隱徹夜飄隨風會聞武陵源桑  
麻亦人耳或云天台山神仙戀妻子多生情緣纏縛苦不盡  
爭似餐霞煮石鸞翔鳳趨天半高眠有如此仙香沁夢夢斷  
矣沉瀝吸心心淨洗湛然何物象虛明請喝四更山月起

閨峯閣贈羅李二道士五首

鍾吾峯對莫釐峰柳栗新支訪赤松鶴髮一梳雲兩袖天風  
吹現碧芙蓉

最高寒處掩松關萬點烟螺脚底環無上雲頭無上法道人

聲價似名山

點筆分明北苑傳湖山真藁富雲烟載花倘上朝元路好破  
工夫去畫天

彩杖陵虛說祖風五千家法妙參同令昭也在雲璈隊要丐  
飛車問碧空

道根終淺世緣深預怕疎鐘喚出林一路松花雙不借又從  
天上種離心

連日山游頗愜幽趣嗣瀆川沈文起

欽韓

攜酒至舟

中約再探光福鄧尉諸勝酒間賦贈兼示子白友之  
金風號林天蒼莽萬人裹足三人往秋山靜若太古時入骨  
高寒世誰賞狂朋怪侶屬我儕磴道跡絕盤干迴蹙然足音  
出松麓同心乃有休文來虎山橋頭笑捧手湖光灩動黃花



酒烟霞氣合掃寒暄先指一峰傾一斗排岩搜穴須努力請到翠屏深處極樵夫相見莫驚疑不是神仙是山賊

自光福泛舟遊鄧尉元墓諸山

山山凝睇延幽步爭獻風雲導先路是山便好況名山屐齒不周山亦妬綿濛林壑何竊深積岳冒蘿天半陰打頭黃葉不落地舞空各各飛秋心嶠東嶠西杉翠擁銅井銅坑擎雙巘披棘應愁木客嘯踏雲不覺芒屨重掀天何來萬斛濤司徒廟前怪樹交蚪枝擎攫神臂舉奮爪一搏身安逃回颺吹衣毛髮冷却揖山僧求苦茗偶然照水悟真如心與古泉光耿耿勝地尤傳香雪海中有梅花萬株在玉尖未破凍痕凝樹樹峻嶒傲霜待世人只把花時數老幹深秋手誰撫香色俱空骨相堅我視魏徵殊媚嫵風引歸情簪路長烟鬟迴首

各蒼蒼踵遊請待瓊妃笑來試吳兒鐵石腸

天平山

羣山如衆婢心賞苦眼劇一峯妮招人一峯擲又惜天平抗  
奇姿名賢此幽宅獨將骨清蒼一變容媚燼槎枒萬石筍勢  
欲透天脊流雲不敢壓滃滃出山腋暮色生祠陰蒼鼠竄古  
壁巍然窮塞主神肅貌乃憚胷中百萬兵山鬼尙唬魄列戟  
排肥松建纛撐老柏蘿衣曲磴迴聯岳隱林隙曠情掃浮媚  
野意斂矜式憂樂千秋心蒼茫日將夕

由天平至支硎晚坐法螺寺二首

貪山爭一步不怕晚風尖磴僻苔文怪秋陰石氣黔野花嘯  
笑雜僧福佛仙兼欲話楞伽旨誰將妙諦拈  
雲木合蒼蒼捫蘿問法堂佛烟山意靜茶味道心長宿鳥諳

禪板歸樵識定香三支如許從同侍鹿花牀

野行

人家不逢人籬竹斜映水斗覺衣裳單身入青蘿裏寥寥一  
犬吠意倦作旋止傾耳聞希聲前村落松子

寒山別業歌

支硎南去竹雞嘯欲界仙都罨畫溪瓊房璇室烟蕪沒玉筍  
瑤簪螺黛齊當年高士王孫胄列鼎重祠門闕舊掃除榮願  
付苓通愛憑水木餐明秀椎岳鑿薛起蘭櫟五架三間占地  
偏廬墓偶然營丙舍入山好在趁丁年風味寒猶同措大楓  
窗石几排秋課屋中金石屋頭山一例雲烟眼前過蕙帶荷  
裳瘦木瓢金芝瑤草不時挑松關行藥攜馴鶴風幔攤書得  
墮樵更有仙儔陸卿子人間嘉偶無過此牒草同薰薤葉香

長箋對擘雲藍紙百城南面足優游千騎東方笑上頭夫婿  
有人稱石隱妾心無夢覓封侯珊瑚碧樹交蘭畹館倣琅嬛  
堂小宛秫酒莠成舉案酬胡麻種熟齊牢飯鷗波亭上墨霏  
花清獻堂中索鬪茶爭似鹿門偕隱侶依然鴻廡布衣家吳  
儂悔不生身早相約誅茅事幽討采簪何妨挈孔妻入門應  
許呼龐嫂讀書往往古歡符靖節前耕翟後鉏釣澤羨攜梅  
尉女移居須得鮑家姑奇福千秋幾人占巖棲我只山資欠  
鏡閣高情負鹿車刀環離夢縈雞店白雲夫婦識耶非有客  
欬歔坐翠微一片江湖蓬轉恨漫山風葉亂如飛

山游雜詩十二首

露蕋香中兩槩開浩歌聲入紫簣堆新詩不索人間和只令  
羣山答響來

野慈姑白水  
蒨嬌宛轉溪  
橫曲尺橋不  
用黃頭好身  
手有松陰處  
便停橈

山弟山兄儘  
不凡穀皮巾  
子紫蕉衫題  
名要做磨厓  
搗莫把雲根  
孟浪剝

陰厓小語白  
雲驚一帶岳  
花莫問名摠  
是采香人過  
路爭教秋士  
得忘情

空谷無人草  
自妍素心何  
處寄秋烟碧  
雲迢遞蘭香  
杳折到疎麻  
一惘然

出山水濁在  
山清笑指流  
泉也世情不  
及琅花秋泣  
雨單心長是  
可憐生

六枳笆籬短  
簇莎平泉池  
館冷捎蘿西  
風不長當歸  
草笑看漫山  
遠志多

蘅蕪一徑小於釵茶事春前姊妹偕今日紅心還絆路知他  
少女幾兜鞵

鰭沙作鬢薛爲裳負畚丁孃貨槩郎一樣樵歸相媚嫵世間  
真不信姬姜

衲子蠶房燒芋便吉由羅底拜金仙我來準斷三心縛又被  
瓶花笑破禪

青絲紵纜靠山樓地是龜峯峯又西更沒人家但烟水夜闌  
只好聽天雞

風雲色色入詩腸柏白楓丹槲葉蒼擬翦吳綾圖半臂出山  
歸與細君商

西山之游徐明經

雲路

以病不與歸後出詩見示次

韻二首

落葉隨風打畫船尋山不用紫騮鞭  
芡糧伴鶴三升裏蘿磴爭猱一綫緣  
病笑畸人慵蹋壁夢隨松子定排烟  
狂奴也受維摩劫羸爾雲頭爛漫眠

廿年蓬累負巔峴此日先君到上盤  
白舫倘尋前度約青山已作故人看  
寄聲鶴侶裝重戒慎莫鷗盟話再寒  
七十二峯攢翠待踵遊書促報劉安

小謨觴館詩集卷五

小謨觴館詩集卷第六

鎮洋

傭書集二

丙辰迄戊午

淮安三首

赤緊江南郡洪波浩浩侵片城低過水估楫密於林卜有升  
虛望人懷去絳心怪來詩思減只作越人吟

鐵鹿排堤堰高墉面碧流重臣防伏汎行子禱陽侯誰擅疏  
排策長懸昏墊憂水衡錢不易蟻穴謹神州

財賦東南地頻更水滂年流亡稀雁戶輸轉困臬錢給復  
皇心軫揚仁吏治先哀鴻非易集善體

澤如天

陸包山百碎圖讚四首



隨世亦隨落一物一尻首冷笑媧皇駛忙煞補天手  
畫作天地爐碎爲萬物銅只有一滴水不壞毘嵐風  
云何是常住非碎非非碎佛言八解脫此言大三昧  
陶輪擲恒河磕空碎不完百億閻浮提應作如是觀

題暉南田山水畫冊十首

春嵐積翠傲馬璧

連天一色碧翁翁不是吳峰是越峰料得南屏持戒日畫禪  
叅徧玉芙蓉

臨文符詔古樹圖

語錄依稀記苦瓜寒林圖合道林义嬉春一任時人眼細柳  
紅樓說馬家

江山勝槩圖

碧水丹崖萬里長一縑粉本肖南唐江山如此清空景怪道東坡戀武昌

攸趙大年寒鴉圖

麝煤花果弟兄行題句涪翁墨尚香爭似聯翩寫鴉尾和他  
蘆雁伴鴛鴦  
山谷題大年圖有雖有珠簾巢  
翦翠不忘煙雨罩鴛鴦之句

撫子久浮嵐暖翠

畫山不畫米家山一笑春風盡破顏曾否芙蓉湖畔住看雲  
樓也構三間  
大癡每作畫必登樓觀雲  
氣變幻以為布置見畫苑

臨黃鶴山樵松壑吟泉圖

松篁寒玉寫秋姿筆壓烏程老畫師絕憶清風茗雪路道場山下立多時

撫巨然溪山秋霽圖

小詩集卷六 二  
黛掃秋山宿霧空  
白門禪筆妙關全  
宗風念取傳衣日  
幾許深情到諦公

同王子石谷游虞山劔門作圖

擘開青玉似褒斜  
石屋雲深有幾家  
未免山人笑游客  
玉杯只泛尚湖花

瀟湘夜雨

詩情清峭夢華醒  
老隱東園寫洞庭  
豈有滄桑瑤怨在  
楚天風雨感湘靈

李成寒山雪霽圖

雪棧冰澌粉墨痕  
山明松磴露霜根  
北風振觸龍堆夢  
銀海搖花認雁門

題錢舜舉貢葵圖同張子白作

槐龍翠蔭蛾眉班玉階如肪拜百蠻鋸鋸奇珍間師象殿脚  
百怪羅神姦四尺風猗稱善狗花鬢貉子雙繩手盛朝豈忘  
旅檠書要遣遐荒効奔走呼韓使者朱作經偷撐碧眼瞻龍  
庭衮衣玉座儼不動九天仙樂風泠泠粉本閩家畫貞觀當  
年王會雲霞爛先生故是小朝人虛費明光摹一段景定之  
間畧可數封疆不到黃龍府回鶻琛無玉勒鞍蒲端貢絕紅  
鸚鵡末季蕭閒鄉進士舜舉宋景定間鄉貢進士侏僞任昧鋪張侈閩馬  
安能致遠人冰簟只見迎金使應憶熙淳全盛年橐駝五百  
馬三千吮豪繪出思周意或比詩人賦下泉否則厓山風雨  
日紅毘滿地悲王室卻把豐亨想盛唐看來同有滄桑恤六  
百年間事無定咸賓除是興王稱露紆魁頭墨半黥蘭栢桂  
棧丹猶瑩拓土開邊白雁誇爻閩風物果誰家卽看茗雪丹

青本何異東京說夢華

題錢舜舉春社圖和子白作

黃鴉穀穀鳩雨晴十家五家挈隊行神錢花鼓各霑醉紙上  
一片酣嬉聲斜陽萬條翠隴明前後人影交敲傾桃花如雲  
攔路迎千紅笑與酡顏爭社公酒足神應享禾黍今春定豐  
穰歸來穩卧三重茅不怕催租打門響玉潭畫人兼畫神一  
一想見羲皇民如金王度不可倣繪此熙皞堯天春不隔南  
阡與東畝太和盎歌盈阜須知天子萬年觴只視春農一  
杯酒鄙人家住東吳東桑柘亦有蓬蒿宮三升治蠶看人醉  
醒眼妬煞鷄皮翁薑稜瓜區都賣卻牛王廟前鄉夢惡無田  
無酒我不惜惜此身當太平日不然摹取先生筆搜身入圖  
添我一有手不把犁與鉏請君卷卻春社圖

書陳眉公雜題畫冊詩後二首

辛苦風騷雲壑身  
釣磯名肯老鱸莼  
校書藏印尚書跋  
都是徵君傳裏人

筆花飛燦墨花濃  
丐字遙知徧九峰  
應笑牆東老牛僧  
一生祇解作耕傭

淮安郡齋九日題盛子昭山水趙仲穆書歸去來辭  
合裝長卷

聊蕭落葉鳴窗牖  
客裏花糕作重九  
西風蓬蓬惱鄉思  
愁入胸中起堆阜  
不無騷怨儼三閭  
那有高情方五柳  
天公似憐太岑寂  
故遣江山落吾手  
武塘一匹東絹好  
煙水千層黛痕厚  
林壑蒼茫彭澤耶  
湖船約莫潯陽否  
裝池況合宋王孫  
墨妙真繼鷗波叟  
淚斑莫問到林筵  
秫稅分明思畎畝  
橫卷書

成歸去來富貴於人復奚有明厓好事作聯璧三絕標題應  
不苟當作江湖招隱看無乃風塵笑誰某悠然南山不可見  
冷落東籬等閒負古人何心摹栗里賤子忽思安井目眴如  
二鼓登高歸鐙火天涯鎮相守縑素催愁有底長雲煙過眼  
真非偶此書此畫且莫看爛醉猶存白衣酒

徐武功詞卷墨蹟

卷長三丈餘草書似素師極雄宕

殺士口扶天手奇功可邀不可久金齒歸來雪盈首學作謝

太傅竊比裴令公東山綠野事豈同浮雲蔽日苦乃翁

皆用詞中

語

新詞琅琅書更敏倣太湖精作蛟蜃墨花怒卷字低昂但

覺老驥聲中陲壺緊曹石輩良可哀側注冠安在哉愛才獨

有西村客墨寶流傳照後來

此卷武功書與史明古者

哭前亳州刺史裴立齋六首

哀問三秋至親朋一哭同病還  
勤滴露天遽奪扶風挂劍遺  
言在懸刀昔夢空平生知己淚  
愁絕是吳蒙

蕊榜傳韶歲松山試冷官問奇  
來百濟織句徧三韓大雅扶  
輪易浮生駐景難何人哭遼海  
振觸舊經壇

夢蜨莊周宅猶龍李耳鄉一官  
書上考千石重循良家法唐  
中令經師漢后倉譙陵行部地  
孰奠寓公觴

宦海誠多故鵲音鳩毒侵蒼生  
虛望眼青鬢謝朝簪閒煞經  
綸手拋殘利濟心東山想安石  
流恨滿焦琴

不道三年別俄成地下遊功名  
摧半道心力枉千秋遺籍諸  
郎護豐碑衆口留誰成名宦傳  
莫忘小黃侯

有約來淮浦秋風把濁醪報書  
成絕筆揮涕罷登高路已人  
天隔名曾月旦叨茫茫後生感  
東下歎奔濤



賣書行

十家士人九不給貧極撿書成俗習萊蕪室內鳴飢腸故紙  
堆中搜秘笈當年甲乙重標題萬卷遙知費編輯芸葉曾防  
羽陵蠹錦暉或用波斯襲浮雲世事不可久卻爲兒孫覓升  
斗遺業曾無八百桑舊家自有千金帚傾筐倒篋驅鱣魚載  
以兼兩薄畚車易錢難比瑤華乘書券分明博士驢富兒有  
書不解讀貧兒欲讀無其福餅金輦致玩好同插架牙籤手  
誰觸白氏楊枝臨去吟教坊後主新降曲明珠脫手各傷心  
同向豪門成一哭東鄰西舍何紛紛此厄不啻江陵焚平生  
我亦書是癖搜羅八索窮三墳飢來貸盡監河米獨抱遺經  
不求濟請讀難窺中秘書癡懷尚羨河間邸年年乞食非良  
圖此事寧保他年無徑須急辦五畝區去作識字耕田夫倉

箱謀卒歲杭稻收東吳穰穰但祝年屢豐雖貧不賣杵與舂  
人間長策無如農農夫一笑稱未善君不見鉏耜昨爲輸租  
典

淮安郡齋歲暮雜感十四首

霜氣凝嚴朔氣清天涯雲物歲將更日輪西仄分鴉背風色  
南催緊雁程有限華年慵檢歷太孤羈緒似逃名一方官地  
三椽舍那許閒愁歷亂生

終朝齋閣對飢烏訪友尋梅一事無得我心應推柏酒傍人  
門只學桃符天慳雪意留雲厚樹作禪容入定枯急景凋年  
有如此鄉思那不夢菰蘆

僂指衡門樂事除長貧雅好似山家春浮骨董羹邊酒梅吐  
平安竹外花饋歲不妨刪俗例號寒還是美生涯年年枉費

侯鯖飫持較園蔬味便差

經帷寒勝廣文壇兀兀烏皮只自憐  
枕火坐窺爐冷暖敝裘能與我周旋  
了無著述拋三上如許頭顱易百年  
差擬攬身儕脉望食殘書字博神仙

靜掩莎廳抵索居淒寒無夢到華胥  
敢希選部長名榜羞上諸侯濶扁書  
嶽嶽號權叨五鹿厭厭氣畧勝曹蜍  
浮華齒冷梁園客裙屐風流合讓渠

濃雪如鹽撒院墀酒酣鈴閣敞  
翠恩絕奇馬耳埋尖日也有烏頭到  
白時黛色幹移松面目風威檐拜竹  
腰支凝寒振觸南天感鐵甲銀槍十  
萬師

蠻煙極目五溪兵經歲勞修薄  
伐刑飛鳥不過山瘴癘將軍一去  
樹飄零終然長組嬰盤瓠未礙前  
營落大星見說衝寒

羅曼拔箐林誰勒孟陽銘

妖鳥羅平掠地飛春來戰及雪霏霏從戎士盼歌黃竹沒命  
軍猶效白衣授璽劉宏寧劇賊平南膝撫要先機書生不博  
西京簿只望交龍破敵旂

還州烽火接梁州蟻子都屯楚上游僞譏荒唐唐三屈律將星  
搖動五諸侯檻車劇報收盧植巴國休輕縱李流正好奇功  
乘雪夜鴨鶩聲裏落旌頭

北望河流走陸深朱絲繫玉幾回沈詞人只歎黃樓水使者  
虛揮少府金一綫何年安夏服百端時事入冬心豪情輸與  
諸曹掾比舍歌呼倒佩簪

府君東閣似咸陽紅燭高然博進場聒耳臬盧爭五白幾人  
文字檢三蒼飛騰影乏膠黏日跋扈風催樹介霜一語諸君

細商畧送年還是醉差強

又見官厨裊篆烟醉來司命一酖然分飴到處兒童笑進酒  
看人骨肉全臘鼓自喧愁獨夜客心無賴况殘年遙憐鏡聽  
占歸者猶爲狂夫拜竈前

瘡瘡綿綿抱影身劇談濃笑任比鄰茗爐寒守冬缸獨朱墨  
偷排夜課勻有語斷難諧衆耳知心終要算家人團樂鐙火  
西窗暖夢盡刀環總未真

松盆香屑柏枝枝看到辛盤啟宴時廿數光陰輪下坂一年  
心力祭先詩無人守歲眠須早見跋昏鐙醉并辭但學蘇翁  
祝長健春風還上鬢邊絲

上元四首 丁巳

擲堂花爨開餠餠圓月頭番曲宴酣客味丁年仍食蓼新聲

子夜漫傳柑筒波瀉玉千觴直歌豆拋珠百琲堪紫焰滿庭  
香霧塞好分春影照何堪

乍軫鯉弦乍暖簧雛鶯一隊小排當十分頑豔爭車子百種  
清愁訴里孃淒切也應悲失路語言差好似同鄉良宵莫譜  
淋鈴曲促打花蠻舞廣場

十六仙魔勾隊齊蛺膏萬蓋閣東西風迴玉蜨宮衣舉月轉  
驚鸞冶袖低廣樂天真開色界綺情人慣墮泥犁開蛾政要  
留歡曲休遣花冠碧樹曉

玲瓏聲伎玉交卮傾倒當筵杜牧之華夢久拋來醉裏歡場  
大好怕闌時臉波霞炫紅紗障心事膏然絳蠟知何處華門  
人抱影一鐙如豆對機絲

客散

客散雲亭影共形夜深和冷數階蓂花當曲院常遲月人倚  
危闌想摘星雙鬢愁緣春促白一羶寒共火爭青頻年冶習  
刪除盡夢斷金堂六曲屏

鄉思

鄉思如弦不可遮俊遊都負卓金車眼穿千里碧雲斷風皺  
一簾波穀斜眠少預謀中聖酒齋空需種女郎花客情早識  
濃如許只辦東陵五畝瓜

夜坐

風雨寥寥夜圖書寂寂帷名常羞地餅心敢薄毛錐爐火紅  
微陷缸花碧欲危揚雲油素在四尺鎮相隨

春夜大雷雨達曉

旗旛十八葉葉明雷君出裝夜西行封姨憑威阿香怒斗覺

天地無春情三更龍宮破陣樂十萬騎士昆陽兵胸中荊棘  
洗不盡天遣玉女盆齊傾羈愁失寐如魚目卻對華堂思破  
屋杜陵憶煞三重茅誰把平安問修竹滅火空思黑槩公人  
間失箸幾英雄但須急辦歸耕具卧對林於賦籛龍

白桃花四首

幾番絲雨洗妝成大素春風太瘦生漫訝天台雲作路本來  
仙子玉爲名白衣一隊花源侶淚眼三年息國情若較風標  
論聲價紅兒爭比雪兒清

不把胭脂鬪麗娟小分梅額便嫣然客來潭水心原素看到  
成蹊影獨憐只有梨雲同縞夜幾時人面學朝天上墳記得  
清明節霜袂珠孃怡並肩

滴粉搓酥渡口春赤闌橋畔望尤親傾城自要天然色打槩



言角會言集卷二  
真逢月樣人畧許楊枝斜倚玉願爲流水與傳神誤他鴨觜  
船多少不敢前溪浪問津

生香誰幻玉玲瓏露井開時別樣風薄命早嫌紅粉誤澹妝  
還怕夕陽烘招來倩女魂逾弱悟後東皇色已空絕稱元都  
前度客鬢絲如雪話飄蓬

清明日齋中雜感八首

又是鑽楓候分明上冢時雨寒花意失春恨鬢絲知賤重瀧  
岡感貧艱麥飯資棠梨故園路迴首忽漣洏

插柳驚人節飄風引淚書年消茶蓼裏恨在鼎牲餘犀角言  
終負牛眠卜尚虛茫茫羈旅意誰解慰臯魚

我父清時吏丹鉛手澤留名慙附羣紀業怕墜弓裘墓木何  
年樹陔蘭一哭休春來烏鳥痛不爲負薪愁

寸草心彌苦終天色養違幾曾勤彩舞何以答春暉衣裂縫  
殘纔家留斷後機板輿花下路愁煞紙灰飛  
弱弟纔扶榻艱難想護雛看同小兒女屬在藐諸孤飽搥虛  
梨栗寒誰辦袴襦遠書還數問曾否識之無

柳色吹晴雪清才憶左芬賣珠蘿補屋看雁淚沾裙風絮無  
詩寄空桑有恨分謝庭何限思豈止悵離羣

蕉萃黔婁婦幽憂寄遠詞刀環半生夢楊柳一春思瘦尚勞  
椎髻情難忘屢屢最憐花絮裏隻影拜家祠

客裏王修痛天邊龐老家看人薦時食隨衆記年華戢戢將  
雛燕紛紛銜肉鴉并將遊子淚遙灑墓門花

讀書十首

仲尼一韋編千載墮雲霧王家尚書郎弱冠誇神悟盡祛識

言角集卷之二  
一  
緯學首改漢儒步清心得妙會名理不嫌趣虛元固微疵義  
旨有深寓刻覈范甯徒深文巧詆忤浸淫逮閩洛勃率論象  
數斯編遂度閣世半飽蟬蠹說經如積薪後輒勝其故飲水  
誰求源惻愴山陽墓

風雅三千篇陳詩一王制聖人去叢殘篇章各就第云刪實  
未刪因樊懲其弊原非擇精粗如今選家例是以牀第言並  
列不爲戾訓故衆說紛無邪一言蔽賢豪此義明不廢閑情  
製咄嗟魯齋徒乃欲刪鄭衛萬古江湖流中天日月麗安從  
得金鑑爲刮迂儒翳

古文孔壁書千載出潛伏隋唐無異舛宋元疑始蓄逮今閭  
與毛雄辨恣反復斷斷左右袒羣疑滋滿腹聊爲解鬪言大  
義固醇肅雖無老成人典型猶在目非甘學模稜述古戒深

酷不然好索瘢罅漏羣經足孟子或刺譏繫辭信不篤寥寥  
天壤間更何書可讀

虞廷命伯夷五典各有庸后倉曲臺記繁詞教慎終未葬讀  
喪禮析義窮期功凶事不宜豫謬始高陽公僉壬寧足責流  
弊成殯風陳編肆刪削大事安瞽聾讀書何忌諱經術師姦  
雄

好古述不作聖言炳日星春秋本魯史書法垂形廷當時南  
董輩一一皆典型何況秉禮國著作留汗青聖人修明之使  
可壽千齡寶書百二十薈萃爲一經譬諸完美物本不煩磨  
礪厄言傳筆削隻字推奇零遂謂韋布儒而操斧鉞刑紛紛  
窺天管各墮雲冥冥

六經入聖基致功始小學名物求典章制度詳禮樂是以漢

儒林獨取訓詁確何曾侈性天空言涉綿邈陋史別品流道  
學分犄角駸駸滋流弊白腹誇先覺月窟與天根高談風影  
捉安得槐里令一折充宗角

古史以辨道今史以耀文卽徒論文字亦貴超其羣暗誦五  
行志陸倕傳博聞漢書精指授大小師秦君欲繼遷固業先  
取致功勤元將著齊錄見戒王河汾事理有述序刊落勞斧  
斤三長不一擅治絲詎免勞簪筆虎觀儒作者多如雲壺遂  
不可見誰當理放紛

廟堂盛歌頌窮愁亦著書兩者各成是何用相毀譽世人薄  
韋布論文必石渠草野習倨侮又笑承明廬寧知不朽事總  
視素所儲文章有權力貴賤兩聽諸衡茅稱崔蔡金馬誇嚴  
徐人自持二說我自惜三餘

詩爲六藝一豈用資狡獪斯語聞劒南名論實非忤紛紜鉛  
槧家殘膏共沾丐候蟲鳴以秋各自詡天籟寧知有心人齒  
冷等自鄧我病頗同衆詩多茂榛薈妖雲兼悖雨祗足驕牙  
僧詞林路深深學海波滅滅擬捐一束筍且蓄三年艾還徵  
放翁言工夫在詩外

士生三代上所執各有業不聞輕去鄉擔囊負書笈風詩感  
別離亦復詞隍呬要皆行役人公家有常法從無浪遊徒乃  
爲貧所脇三王道已古四民產多乏依人千里外前後踵相  
壓卽此是游民古禁今所狎羈孤多艱虞旅情淒以怯長懷  
夏商周盍把東原鍤

一作  
一春不出遊雜取牡丹芍藥諸花插瓶置之齋中有

常年看春我就花今年看春花就我殘霞碎錦落齋頭曳夢  
牽雲無不可細斛香泉小杓堪新指碧色柴窑頗拗枝幸不  
園丁慳壓擔真憐小兒荷玉佩金裙分向背驚黃大白看低  
蟬書窗面面風聊聊半脫宮衣便婀娜客子連朝手親盥美  
人一笑顏齊嗟吳姝殊麗越姝嬌斗室天風等閒墮文薦爐  
薰細細縈雕闌翠幙深深鎖年來羈孤長畏人有願嬉春不  
曾果東皇憐我亦憐花肯使花人兩相左送豔分春供客娛  
已抵名園三日坐曲江高會笑喧闐長安風塵况堀堞閉關  
走馬事不同何用較量成瑣瑣酒杯燭影宵溫磨黃鸝紫燕  
日澹甌瓶花瓶花幾日留終恐春愁未能安

今雨謠

舊雨舊雨參與辰今雨今雨越與秦將飛不飛作絮柳欲落

未落風花春淮陰不羞絳灌伍栗里自署羲皇民雖無休文  
鎗下鉢且吐丞相車中茵吹龍笛擊鼉鼓嚴春謳叔子舞徐  
陳應劉事去二千載授簡無人風已古醉同豪士付蜩蛉遑  
論詩人鬪龍虎飲酒必求鄒與枚何時可築糟邱臺

月下

朧朧月鑒帷稍稍鳥投扉花態半牆影露香三月衣因人諳  
獨夜小立得清機不奈鄉情劇乘風渺欲飛

郡齋闢地爲小圃蒔花其中爲課餘游覽計成一百  
六十字

旅身水浮梗旅跡膏轉轂惟有邱壑心鬱鬱常在腹隨緣足  
幽賞天不私適軸林園豈隨身貴以身自逐鈴齋闕牙仗有  
地豁遠目了又棘蒙茸散碎石歷碌官人不好事曠土任樵



牧留待羈窮徒端來翦榛樸棄之良可惜鷄肋猶有肉關畦  
命場人縛帚資健僕埭花兼埭藥布種如布穀籌車亦有願  
聊學農夫祝海燕傍人門星飛詎可卜胡爲鴻雪蹤乃作屈  
居築好勞人自強得意我所獨竊比魯叔孫每至修其屋

春盡作

罷攜柑酒掩重關寂寂春來寂寂還簾影有波搖翠轂砌花  
無語下紅斑慙叨大府璫分半嬾共叅軍語作蠻讀罷道書  
投筆起畫屏千遍看吳山

夜分作

月已魄三孕身仍屋半椽然銓悲世擾倚枕覺天全覓粒有  
飢鳳在山無濁泉蘭芬與香穗同結定中緣

凭闌

凭闌無定望興到輒支頤  
晶日物多態淡雲峰少奇  
百慵吾道貴一靜世緣宜  
江上元真子追從更不疑

齋述

鉢池山不見苔石亦矜矜  
花意朝暾爽春情夜火然  
命窮空擇術才薄敢求憐  
也識巖居好何途訪僊僊

有懷

烟冷枌榆罷社羣好山天  
遠悵停雲重簾壓雨花無  
氣獨鳥嘯春樹不聞萬軸  
丹黃排月算寸腸悲樂過  
江分林泉侶散  
渠樽歇芳草空勞陌上薰

初夏得家人信六首

印記親鈴小碧牋  
殿春又過浣花天  
凝妝自是愁如海  
卻把登樓勸仲宣

珠方粒米桂方薪赤手支撐累縞巾不道比來餐數減苦將  
強飯屬離人

踏地生愁出賦租幸農田早一鍾無如何尚有催逋吏日日  
花前下縣符

清卿難說好門楣窮薄潘楊兩可悲一件寒衣分典取半贖  
親戚半營炊

胡麻好種願多違敢向東風怨玉徽道是遠遊還計得書來  
并不寄當歸

冷暖天涯只自諳閒憑梁燕訴喃喃一錢不直窮愁骨珍重  
虛煩說再三

夜起

小立棲鴉底修垣斷市聲流雲醒月魄永夜安花情客倦山

資重名忘世譽輕天風足相賞如和玉樓笙

讀史記有感

東方奏牘只佯狂對策平津負武皇雲夢賦成天一笑可知  
犬子是資郎

重有感

都尉鴛鴦絕妙詞輸他枚馬得逢時柏梁臺上昇平樂屈煞  
將軍漠北師

東軒晚坐三首

暝霧羃花花映屏蘋桐可可佛桑肥蝸涎黏壁不成篆蝙蝠  
拂簾時一飛

棗畦棚間玉鷄苗錦里前遊一水遙白袷涼衫青扇子荻花  
村裏看魚標

浴罷魚梳約鬢層月眉人影舊看承邀涼記得鈎簾語但上  
重門莫上鐙

楊僕

楊僕樓船將江東驃騎營姿空擅熊豹罪坐縛鯢鯨滄海原  
無浪爰書自有名薤歌餘野哭風雨咽潮聲

夏夜

燕蹴越藤開蓉塘罷晚雷雲稜承月上析語截風來跌宕妨  
文史周旋到僕臺使君林自樂誰勸碧筩杯

得甯止齋潁州書卻寄二首

廣柳車回悵斷蓬焦陂書尺達秋鴻君家兄弟知侯喜吳下  
親朋少伯通葛練裙寒人走雪烏衣門改燕翻風天西一輩  
遨頭侶憶煞花穠酒釀中

丁年閱盡數乘除乞米侯門便曳裾家事恍更龍漢劫賦才  
思著馬卿書香清橘味流淮浦雨颭梅風眺闔閭此日鮑防  
孤窶慣不煩良友數欷歔

寄任棠村

繁花不照越鄉春旅雁牽牛望夕晨賤謁諸侯叨止客號稱  
遊子實窮民開紅長憶衝烟棹慘綠真憐釘座人白業芳菲  
近無恙能消幾許酒如銀

檢舊作詩文自題

三角都籃眼乾螢漫自驅聲愁鄰北里學悔失東隅家詔靈  
蛇握誰堪卽鹿虞寸心權得失作計不嫌迂

長夏閒甚

青霞不可梯八尺簞風淒蜩響憑高健葵心困午低倦情貪

客過醉語畏人提誰識傭書客東城解鬪鷄

客中讀故書志感

客囊雖儉一經隨信手絳帙日影追朱墨藉開遊子眼瓶罍重觸鮮民悲傳家不乏无功集題墓還虛有道碑遺籍滿前難卒讀暮雲殘照苦低眉

郡齋聽前廳合樂竹肉淒清五音繁會觸緒興感率然成詠

黃簾綠幕緘愁處一丈紅薔習香絮不隔天風送紫雲十三弦上春鶯語仙音鏘然韻清泠此曲除是飛瓊聽忽聞入破玉簫裂萬里碧空霞變青小部盈盈想車子手捉犀槌柔繞指江南花月李龜年初日芙蓉周小史簧清管脆相間鳴人知聽曲不聽情卽看雄鳳雌凰竹何限離鸞別鵠聲一聲聲

逗蓮華舫木門倉琅坐淒愴華夢三生杜牧愁綺情萬疊湯  
休障羈緒惺忪對落紅感人何意玉玲瓏推烟睡月家千里  
撲筆含淒唱慙公

晚卧東牖下

蓼蓼廳鼓搗晚衙閣閣池草鳴官蛙曲屏深院半星火大葉  
叢杉無數鴉眠花青牛意倔强撲帳白鳥聲號呀覩覩醉眼  
兩不見新月一條窺枕斜

戲作六首

樹乏千頭奴婢稅無八百桑株覓食鳥鳶穀穀徵寒鵲鴿跖  
跖

公膳雙雞入饌堂厨參豹堆枰勝否四婆裙後一壺春酒牙  
酸



經帷鄭草自長幕府庾蓮孰堪衮衮婁脣谷札寥寥周北張南

甕頭賭酒無卓洛下談天少闕笑煞影妻椅妾何如漁弟鷗兄

風差翠竹梢亞雨打紅蕉葉齊不若濃陰卓午清圓一樹棠梨

花面吳鬟十四鴉頭菱角三千塵土楚元王廟詩魂范大夫船

東園薙草詩三首

天漿滋羣卉不擇美惡生安知蕙畝中莠良無並榮豕零與魚腸細碎穉含名非類要必鉏捕鼪寧有鼪腰鎌集臺笠斷割連根莖無聲恣殺伐狹巷交短兵白日麗下土衆芳燦焉

明刮眼不傷目我以醫術行

草生恐如人愁長更如草蔓滋有力除蓬心無術掃茅塞不自去施行無乃倒豈知塵棘胸正以治懷抱芟夷蘊崇之借草聊自考芳風泛蘭馨廣陌開日杲非緣滌垢心遑學燒畬老聖訓我豈忘初生慎毋天

申椒滋不茂荃茅伐更長薰蕕異榮落天意何茫茫糞壤充帷笥恐負春風香江淮地宜禾東菑正蒔秧旣愁金木害復慮蝗蝻傷盍將長養心移之在稻梁無田得米賤飽飯亦徜徉寄語勾芒神無爲憑莠稂

相逢行答吳江郭頻伽

磨

鸞鷺巢椅桐鴛鴦睇層雲光儀匪遠兩脈脈要與黃雀羞同羣淮山叢叢水舒舒乞食胯下橋邊趨有美一人佩瓊琚類

同王孫立路隅神龍揚光不見燭塊獨遊子心煩紆子奏晨  
露我歌咸池飄風過耳忽焉感之一尺瑤華枉先報繼以妙  
詩申篤好清風褰帷月當軒通詞布素馨若蘭相逢絕似溝  
水頭便學二鳥鳴相酬各挾勝事三千秋弟畜灌仲儒兄事  
袁將軍天涯落落幾國士到眼餘子徒紛紛星萍勞蹤事無  
定不惜裏言爲子罄野棠未落山櫻然韓侯臺前送離船相  
逢卽相別相憶行相憐願君爲夔我爲虻勿問市頭諸少年

淮陰兩生相逢行贈彭二甘亭

吳江郭

馨頻伽

青天盪盪淮陰城城中城外惟兩生一生來吳淞車腳  
偶轉風中蓬一生弇山客作客三年歸不得吁嗟兩生一  
城隔一生不入一不出一生閉置新婦車夜惟抱影日抱  
書偶然一落筆驚走千蟲魚一生自是悠悠者肥肉大酒

便結社有時精悍生眉間有時蒲匐出胯下矐矐曉日城  
門開千人萬人紛往來爾生白眼看<sub>二</sub>不見但聞鴉雀浩浩  
聲如雷何來故人忽傳語<sub>二</sub>謂尤咫尺兩生奈何許一生馳  
書若傳箭一生笑口如流電十年鄉里各叅商豈意今朝  
乃相見嗚呼世間萬事奇絕都若此男兒那不長貧賤韓  
侯臺下波粼粼漂母祠前草没人英雄兒女盡安在天涯  
珍重雙浮萍明朝一生挂帆去東將入海隨烟霧<sub>時將之</sub>  
從來國士本無雙斗大淮陰讓君住

望雨次王含谿觀察韻

柳帶輕陰草帶烟弄晴難準插秧天儘拌雌竹停吹笛莫遣  
雄虹又飲泉得尺便應農燕喜此宵須共漏蟬連梅風不隔  
登樓目盼斷青青稻稜前

喜雨疊韻

不用靈壇禱篆烟  
蟠龍聽鼓早行天  
須知大府隨車雨  
絕勝將軍拜井泉  
望裏梅陰黃欲滴  
漲來瓜水綠平連  
作亭倘志東坡喜  
應許鯁生彙筆前

聽雨疊韻

青逼銅荷火線烟  
夜深涼逗畚蘭天  
坐疑替戾零鈴驛  
想到東丁噴雪泉  
少女迴風還婉約  
做廬有竹定娟連  
新秧一道婁江路  
緣到誰家白板前

曉雨次韻三首

夜雨不知曙朝光  
闕畫紗一涼先愜夢  
百和靜薰花蕙圃  
紅心草荷田紫椶  
茆倚簾供極目教  
拓玉鴉叉晨鼓沈  
鈴閣蕭齋萬綠中  
步苔雙屐印沐髮  
一梳風客思寒

喧異天心長養同僑居似桑楚隨處祝年豐

老屋江東隔茅柴記壓檐野團秧馬隊籬迸鐸龍尖風雨梅  
天杳平安竹信淹倚闌思卻問蘿薜幾重添

雨夜示丹徒張秀才

景桂二首

棟風吹雨漏沈沈不斷簷花入戶深斗酒暖消殘夜話一鐙  
寒見旅人心誰分桐實哀雛鳳願祝南枝穩越禽官屋半間  
雲壓幕與君彈盡雍門琴

聞說清芬戶乍凋山資那得橘官饒從無白練能干謁未可  
青瑣怨寂寥作客遺經留竹素出門歧路慎蘭蕭蓮花池上  
紅薺館且課書鐙一寸挑

懷杜閣次東坡虎邱寺韻

并序

趙甌北觀察檢少陵壯遊篇有東到姑蘇臺云云玠議建懷

杜閣於虎邱以配仰蘇樓謀之蔣立厓郡司馬歷有年矣嘉  
慶二年夏陳方伯任太守聞之共捐俸千六百元置蔣氏塔  
影園規爲閣地尅日鳩工閣成太守并以虎邱塘本白傳守  
郡時築遂又祠香山於其中各作詩紀事次東坡虎邱寺韻  
立厓書來索和作此寄之

山祠敲習池羊碑仆峴嶺古跡無後賢料理誰井井武邱仰  
髯蘇名與秋霜耿一樓喧萬口聒耳甚蛙黽豈知有心人闢  
幽同鑿磧高情曠冥搜古意發精猛頗憐浣花翁扁舟昔遊  
騁飛星不留蹤山色代酸哽急買園百弓恰面波十頃閣支  
一峰危蹟顯千年冷陪祀兼香山三賢趣同永風流緬唐宋  
瞻拜追遐景補此缺陷天國彼鴻泥影蠟屐倘許登瓣香從  
主請

王含谿觀察移節粵西風雨殘秋索居無侶感舊懷  
人書寄五首

五嶺高牙壓塞雄天書朝下騁花驄似聞蠻徼需莊蹻未許  
淮陽卧汲公吉了曉烟山似墨枕椰披雨路如弓離懷也比  
牂牁水直送前旌象郡東

矜徒山子占蠻荒牙節昆侖拜武襄南郡好容人市帙西鄰  
須慎女爭桑歌翻跳月詩逾麗樓拓籌邊鬢易霜珍重武溪  
鳶跼路尺書勤與報沅湘

丹微迢迢溯隼旗從公虛擬傍驂駢直愁梅瘴侵孱骨敢厭  
蘆花絮客衣八桂風迴鄉信杳九龍雲合使車稀飢鴻總有  
隨陽願遠到衡陽也倦飛

鈴齋契分數年年慙愧諸郎拜帳前不把軍書煩阮瑀直將



都講例彭宣風雲一別真如雨萍梗三秋欲問天峴首登臨  
倘垂憶也應迴首向蠻烟

萬里檐帷別緒新羗村歸守草堂貧更無嚴武能容我都恐  
宣明善傲人十稜香霏霜後菊百觚狂落酒邊巾長飢差得  
閒居樂且典秋衣買紫莼

丹徒舟次姚秀才招飲

戊午

落帆市鐙明獨客酒懷勇春風引游屐新雨荷矜寵青矜二  
三子繙帙千百擁坐我烏皮間煩君綠醪奉妙書皇象辨側  
體吳均啐湖海驅遼遼惡夢夜種種居然文酒樂一壓風波  
恐星影搖簾鈎月痕澹窗孔旅程迫西津酒伴謝南董浦漵  
天蒼茫魚龍浩呼洶再拜出市門屋角大江動

首夏北上至清江浦以病不果行歸里卽事書懷九

首寄青浦王述庵少司寇

病劫殘殃壯志非扁舟歸欵舊柴扉豈應身世終丹竈未許  
風塵化素衣藥裏倦拋三寸管春絲虛織九張機行藏一笑  
真何似鼓打迴颿鷁退飛

長安日下望迢遙書尺名卿枉見招革帶久移圍一孔白袍  
愁說燭三條本無榮願妻孥諒漸有離心僕隸騎梅雨滿天  
蓬樾闔獨憑禪語證芭蕉

維摩一榻夢蘧蘧紅硯宣豪事已虛灼艾寒消聽雨後看花  
心冷閉關餘粗諳道味并棲谷頗戀天年未著書只負平津  
延客意苦將金馬祝嚴徐

親串猜疑里黨驚誤他黃紙盼春明半生我已恬枯苑一第  
人都作重輕奪錦喧呶爭八采草元寥落抱單情名山副墨

差堪託記有歐陽識曼卿

凌烟高閣接蘭臺卿月文星照八垓露冕雄官重譯仰禮堂

樸學一人開

戴東原太史爲司寇作鄭學齋記稱近時爲漢學者自先生始

五千屢夾春秋

比卅一齊收大雅材天上巢痕留爪跡憶從東第話鈞台

鷹揚壯歲騁犀戟蛇鳥經曾注握奇油幕談兵韓吏部天山

磨盾傳脩期降書贊普歌槃木表葉多羅拜谷蠡生笑渭南

誇將畧幾曾親展渡河旗

手掌騷壇杜若洲屏風傳畫白江州錦堂不改三旌服書局

仍開二品樓無恙靈光瞻一老卽看餘事已千秋心香下盡

詞人拜問字聯翩薛澣舟

挽鬚猶記鯉庭過道共霓裳詠大羅孔李敢言投分在雲泥

無奈各天何十行佳傳重泉慰

公與先君子同舉癸酉五鼎鄉試去秋爲作墓志銘

哀情賤子多拂拭延州題墓字幾回清淚感蒿莪

蕭然塵榻傍爐薰債券叢殘藥券紛伏枕尚裁求米帖養病  
須辦送窮文龍頭瀉酒拋燕月鶴足傳書下海雲濩落心情  
蒲柳感擘牋都與訴河汾

立厓郡司馬以出塞集屬選定爲題三詩於後

想見隄麋盾鼻磨弓衣傳唱徧蓬婆最難謫宦才名大從古  
將軍揖客多收拾邊笳歸韻語玉成詩境仗風波鬚眉老健  
林泉穩踞坐桐陰一放歌

當年赤縣笑寒帷小謫仙鳬絕漠飛譴薄軍仍叅雪帳關寒  
詩亦帶霜威定知繡谷留春好未免青衫有淚揮至竟騷壇  
需大雅玉門司馬等閒歸

吟箋傳過雍梁州手彙親攜屬校讐一字豈能刊末學千秋

已足抵封侯西流黑水名同遠北望陰山我亦愁風木餘哀

壯遊夢雁門天迴怕迴頭

先君子宰樓煩時予曾作塞外遊

寒夜題沈

欽韓

詩卷七首

薄繭不成溫疎雨不作陣破窗坐深宵尖風利於刃一卷雲  
卿詩中夜兩眸振六書炫雷雷百怪離蛟蜃古錦天吳衣蠟  
珠越人費殘鐙不敢花簌簌落寒燼甘稔少年場結交有才  
儁誰能破萬卷所見亦云僅吹毛吾豈爲獻芻或可信君立  
百尺竿僕請一言進

人讀等身書如將兵十萬兵多行慮譁書多語愁蔓何以節  
宣之一心制衆亂不見陸士衡才富轉爲患亦有淮陰侯多  
多乃益辦氣清馬行空肉重沙搏散要以我用書勿爲書所  
絆子才如金城有衆兼楚漢慎彼寸鐵攻偏師來一旦

古人詠史詩一一皆有託今人詠史詩紛紛乃無著徒抱炫  
學心聊博時流愕龍門逮脫脫所著塞六幕本爲習讀書匪  
曰饋貧藥令皆入歌詩毋乃彈詞若欲探風騷原先須體裁  
度一言以蔽之毋無爲而作

昌黎論文章頗譏崔立之平生顙首逐獨有東野詩崔詩多  
戢戢今無寸卷垂孟詩何寥寥百世不敢疵一易而一難公  
早爲之辭心旌必奕奕筆端勿纚纚先愁我肺腑乃入人肝  
脾

我年方舞象抗志攻詞章交賢豪長者歷晉燕齊梁同儕頗  
我許有筆如鐵槍所嫌好奇博不復勤簞揚墨瀋恣淋漓心  
苗轉微茫荏苒十年來迷途返康莊立言必根情選字必擷  
芳敢誇臻粹精頗解除秕糠黃河泥五斗銀漢清且長盍迴

昆侖槎獨駕天上航

學詩聖人教非求名譽延子史爲之輔經術爲之先豪釐爭  
一著無本木乃顛念我同心人樸學相窺研貢言勿嫌迂愛  
摯求其全世俗妄妄者聞規必護前彼哉小夫耳我黨慎毋  
然

歲晏無完衣瓶空無斗筲不苦乃復樂刺促寒蟲號責人斯  
無難我亦良自嘲冷案抱冰雪古歡抗劉曹不登泰山巔不  
與談九霄不超俗工遠不與談鈞韶我心惟子期我舌惟子  
饒三更梅花屋一笑天寥寥

小謨觴館詩集卷六